

Protocol dalla radunonza communal dils 20 d'uost 2020 allas 20.15 uras en casa da scola a Breil-vitg

Perstgisas: Maurus Tomaschett, commember cussegl da vischnaunca

Presenza: 78 personas

Tractandas:

1. Beinvegni ed approbaziun dil protocol dils 29 da november 2019
2. Decisiun: referendum encunter decisiun cussegl da vischnaunca
3. Varia

Beinvegni ed avertura

Il president communal, Clau Schlosser, fa a tuts presents in cordial beinvegni, alla radunonza communal sut las cundiziuns spezialas cun tener distanza e da purtar mascras.

Sco dumbravuschs vegn Ludvig Desax, Dardin e Marcellino Flury, Breil nominai ed elegi unanim.

La gliesta da tractandas, ch'ei stada publicada els davos fegls ufficials, vegn suttamessa alla discussiun. Da tala vegn buca fatg diever e per consequenza vegn la gliesta declarada ligionta per la radunonza communal da questa sera.

1. Approbaziun dil protocol dils 29 da november 2019

Il protocol ei staus exponius sin canzlia communal sco era sin la pagina d'internet dalla vischnaunca. Dalla discussiun vegn fatg negin diever. Il protocol dalla davosa radunonza communal vegn per consequenza approbaus entras tscharna unanima.

2. Decisiun: referendum encunter decisiun cussegl da vischnaunca

Il cussegl da vischnaunca ha approbau la revisiun dil fegl da tarifas dil provediment d'aua sco era dalla deflussiun a caschun dalla seduta dils 24 da zercladur 2020. Cun scriver dils 13 da fenadur 2020 ei vegniu inoltrau in referendum facultativ encunter la decisiun dil cussegl. Ina proposta concreta han ils iniziants buca fatg. Tenor constituiun communal ei la suprastanza obligada da presentar la fatschenta enteifer 40 dis ad ina radunonza communal. Cun l'approbaziun dil referendum fuss ei buca garantiu che las pretensiuns dil surveglader da prezzis vegnien teni en. Era san las tarifas buca vegni reducidas sco previu. En summa setracta ei numnadamein dad ina reducziun dallas tarifas dalla deflussiun (reducziun taxa fundamentala ed alzament taxa da diever). Sche la proposta dil cussegl e dalla suprastanza vegn refusada, restan las tarifas sco tochen dacheu, ed aschia savessan buca tener en la las pretensiuns dil surveglader da prezzis. El proxim onn fussen lu puspei tuttina lunsch sco ussa ed ei dess puspei recuors. Tier la dertgira cantunala ein dus recuors encunter las taxas dad aua e deflussiun aunc pendants. Suentar la decisiun dalla dertgira dat ei evtl. aunc ina gada ina revisiun.

La discussiun vegn dada libra. Martin Beer sco representant dils iniziants pren il plaid e vul sclariment, daco che las taxas d'aua e deflussiun ein vegni adattai ed alzai aschi massiv visavi ils onns vargai. Vinavon han ulteriurs (Adelrich Berther, Ervin Caduff, Prisca Sgier ed Irenäus Friberg) priu il plaid e fatg semegliantas damondas e remarclas sur digl alzament dallas tarifas. Il president communal pren mintgamai posiziun sin las damondas fatgas ord il miez. Tut en tut vegn fatg ina viva, ruasseivla e buna discussiun.

Sep Cathomas fa las suantontas propostas alla radunonza :

1. star tier il conclus dil cussegl e refusar il referendum
2. instradar ina gruppa da lavur cun representants dalla politica e dalla populaziun per elavurar ora ina nova proposta per la lescha cun sias tarifas.

Quella proposta vegn sustenida da pliras varts.

Per incaricar la suprastonza d'instradar quella gruppa da lavur, ha Sep Cathomas formulau ina moziun :

Instradar ina gruppa da lavur cun representanza dalla politica e dalla populaziun per elavurar ora in nova proposta per la lescha cun sias tarifas. La suprastonza sto presentar in rapport ed ina proposta a caschun dalla proxima radunonza communal.

Era Martin Beer ha formulau ina moziun a scret per mauns dalla suprastonza e dil cussegl da vischnaunca che secloma sco suonda :

Reveder sco suonda las suandontas leschas :

1. Lescha dil provediment d'aua

Limitaziun dalla taxa da diever sin max. CHF 0.60/m³

Taxa fundamentala maximal 50% dalla taxa totala

2. Lescha per la dismessa d'aua piarsa

Limitaziun dalla taxa davart la dismessa d'aua piarsa sin max. CHF 0.70/m³

Taxa fundamentala maximal 50% dalla taxa totala

Vinavon fa Martin Beer la proposta alla radunonza da votar giu a scret sur dil referendum. Quella damonda vegn suttamessa alla votaziun :

Tenor constituziun communal art. 36 ston $\frac{1}{4}$ dils presents pretender scrutini. Cun 78 presents havessan 20 persunas stuiu votar per scrutini.

Il resultats dalla votaziun ein curdai ora sco suonda :

17 persunas ein per scrutini

45 persunas ein per votar aviert

Aschia decida la radunonza da votar cun maunpli.

Martin Beer vegn aunc inagada dumandaus sch'el vegli retrer il referendum. El vul denton schar votar giu la populaziun giudluner. Suentar haver discussiunau sur dil pro e contra da quei referendum e dallas leschas vegn ei iu vi tier las votaziuns :

Sco emprem vegn decidiu sur dil referendum :

38 persunas han votau per refusar il referendum

19 persunas han votau per acceptar il referndum

Cun quella votaziun ei il referendum visaus giu e la decisiun dil cussegl da vischnaunca dils 24-06-2020 ei valeivla e sa vegnir duvrada per tschentar ils quens 2020.

Sco proxim vegn votau giu sur dallas duas moziuns :

Moziun Sep Cathomas retscheiva 59 vuschs

Moziun Martin Beer retscheiva 10 vuschs

Cun quella votaziun ei la moziun da Sep Cathomas approvada dalla radunonza communal e la suprastonza vegn incaricada da metter entuorn quella e da dar rapport alla proxima radunonza communal giudlunder. La moziun da Martin Beer vegn buca persequitada vinavon.

3. Varia

Clau Schlosser informescha la radunonza che Prisca Sgier-Caduff hagi demissiunau per immediat sco presidenta e commembra dil cussegl da vischnaunca. Tarcisi Dietrich d'Andiast sco vice-president vegn a surprendre il post da president, vinavon vegn il suppleant Retus Cathomas a surprendre il post sco cusseglier.

Prisca Sgier declara alla radunonza daco ch'ella ha demissiunau sco presidenta e sco commembra dil cussegl.

Martin Beer engrazia a tut ils iniziants che han susteniu el cun il referendum. Deplorablamein seigi ei buca gartegiau sco previu.

Clau Schlosser engrazia per la presenza, la partecipaziun e la confidanza. El siara la radunonza allas 22.10 uras e giavischa a tuts in bien retuorn a casa.

Breil, ils 25 d'uost 2020

Il president

Clau Schlosser

Igl actuar

Curdin Cadonau